



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Acta Vitæ S. Ferdinandi, Regis Castellæ Et Legionis, Ejus
Nominis Tertii**

Papebrochius, Daniel

Antverpiæ, 1684

Carolo II Hispaniarum Et Indiarum Regi Catholico.

urn:nbn:de:hbz:466:1-4233

CAROLO II HISPANIARVM ET INDIARVM REGI CATHOLICO.



Ub sacram MAIESTATIS TVÆ
aspectum rursus venit TVVS
Nosterque FERDINANDVS, Rex
Castellæ ac Legionis, nominis
ordine TERTIVS, Sanctimoniae
prærogativa Primus: Noster,
beneficio fundatæ dotatæque nobis post Mau-
rios ejectos Metropolitanæ Hispalensis Eccle-
siæ: TVVS, nexus continuatæ per tot gloriosissi-
mos Reges prosapiæ: Utrisque tamen venera-
bili eo titulo, quo ante hoc decennium dig-
nata eum Apostolica Sedes, Sanctorum Hispa-
niæ Patronorum Catalogo adscripsit. Tunc ap-
paratum ordinemque festorum, tali occasione in
TV A Hispalensi Vrbe instructorum, non solum
legendum per litteras, sed & in imaginibus spe-
ctandum exhibuimus SACRÆ MAIESTATI TVÆ;
annos quidem ætatis primæ dumtaxat egre-
dienti, sed jam tum magnifice demonstranti,
quantum Catholicæ pietatis ab Avo tam Sa-

† 3

cto

etō hausisset. Postquam vero, passu eodem quo
gradiebaris ad virilem ætatem, factus quoque es
ad talis Progenitoris augēndam venerationem
æque ac ad vestigia illius sequenda concitator,
exoravisti Pontificium Breve, quo Tvi utroque
in orbe subditi, quotquot ad Horarum Cano-
nicarum pensum rite per solvendum tenentur,
ejusdem Sancti Regis festum solennitate præci-
puā sub Ritu Duplicis celebrare juberentur.
Hinc accensis magis magisque studiis tot po-
pulorum, quo vastissimo Tvo complecteri
Imperio, cupientium nosse distinctius Patroni
novi, tantaque cum prærogativa honoris sibi
commendati, merita ac laudes; nihil videba-
mur facere opportunius posse, quam si curare-
mus, Acta vitæ, non minus Christianæ quam
Heroicæ, inter Annalium veterum codices vo-
luminosos sparsa, colligi in corpus unum, atque
cum tota Postumæ Gloriæ historia fieri juris
publici impressione Latina, quo possint per
omnia Regna Tva legi, inter tot diversissima-
rum alias linguarum nationes. Sic cogitantibus
Tvo ex Belgio, TVAQVE Urbe Antverpiensi,
obtulit se nobis Daniel Papebrochius, è Socie-
tatis Jesu Scriptor minime obscurus, & post e-
jusdem Societatis Patres Joannem Bollandum
atque Godefridum Henschenium, illustrandis
quotquot orbe toto noscuntur colunturque
Sanctorum Aetis cum laude immortuos, Con-
tinuator laboris, Ecclesiæ Triumphantis perho-
nori.

norifici, Militanti vero non mediocriter utilis.
Videramus nempe initia Maji, tribus grandibus
tomis ante triennium edita; & proximum esse
sperabamus, ut in trium reliquorum tomorum
ultimo inveniremus Divi nostri gesta, simili ac-
curatione, fide, & eruditione petractata, qua
tot aliorum illustrium Sanctorum jam habeba-
mus exposita Acta. Sed longa videbatur expe-
ctatio tam operosæ molitionis, forsitan adhuc
in unum alterumve annum protrahendæ. Op-
tavimus ergo ea (siquidem prælo parata jam
haberentur) præmitti in lucem singulari Tra-
ctatu; & qui magna cum promptitudine susti-
nueramus ingentia pecuniarum impendia, cu-
randæ apud Romanam Sedem Canonizationi
primæque festivitati hic apud nos celebrandæ
necessaria; nihilo minori alacritate obtulimus
modicum illud quod desiderari videbatur, ut ta-
lis liber evaderet Tvo non indignus sisti Fasti-
gio, nec infra argumenti tam sancti Majeſta-
tem. Ille vero, pro ea qua Belgæ omnes erga
Hispanum nomen sunt reverentia, tanto liben-
tius desideria nostra pro imperiis habere se re-
spondit, quo ardenter cupiebat quam citissi-
me ab omni dubietate absolvere Reginæ BE-
RENGARIÆ (ejus quæ Sancto Regi mater fuit)
primogenitaram præ BLANCA, sorore sua, S. Lu-
DOVICI Francorum Regis genitrice; Hæc enim,
licet nulli coævorum dubitata, sed à Ruderico
Archiepiscopo Tolentano & Luca Tudensi Præ-

sule , quantis viris ! tunc viventibus omniaque
coram intuentibus, incunctanter asserta ; supe-
riori tamen seculo , etiam ab Hispanis duobus
scriptoribus (ut Gallos non miremur) Garibayo
& Mariana inconsiderate inconsulteque negata
fuit; cum manifesta gentis nostræ injuria, TVÆ
QUE etiam MAESTATIS præjudicio non dissim-
mulando , dum successionis in Castellæ reg-
num naturalis jus sententia illa tradere Francis
videtur. Econtrario promittebat Papebrochius,
in Commentario ad Acta prævio (prout in hoc
libro facit) demonstratione chronologica evi-
ctuum se manifeste , adeo non fuisse juniorem
BLANCA BERENGARIAM , ut mater ejus esse per
ætatem potuerit ; quæ , prius quam illa nasce-
retur, Cæsareum juvenem , sibi à patre despon-
sum , sequi in Teutoniam recusavit ; eoque ex-
pedita nexus , atque post annos abinde duode-
cim nupta Alphonso Legionensi , FERDINANDUM
Filium ipsi pepererat, cum vixdum noven-
nis eslet soror, tertio post anno (qui fuit Christi
MCC) nuptura Ludovico Franciæ Principi, tre-
decenni tunc JUVENI VIRGUNCULA ipsa , sicut eo-
dem ipso anno in sua Carolina cecinit nobilis
& antiquus apud Gallos Poëta (ne fidem Hi-
spanorum suspectam quis habeat) Ægidius Pa-
risiensis. Digna sane , quæ homines , nostris in
rebus , imo nostras in res , tam eruditos profert
alitque Belgica ; cui tantum Hispani sanguinis
non minus quam auri impensum bene credat
gene-

generositas Castellana: cuique se totam impen-
dere & superimpendere cupiat, ut provinciarum
fidelissima, & ea solum causa nunc miserrima,
Tvo, Rex Potentissime, nutu relevetur, &
Abavum CAROLUM, inter Imperatores QUIN-
TUM, inter Castellæ Reges PRIMUM, redivivum
in SECUNDO Rege suo experiatur. Interim idem
ipsum Clementiam Regiam orantes nos quo-
que, jure Patronatus specialiter TVI; cum Belga-
rum votis jungimus & nostra; ut qui, cum Se-
renissima Uxore MARIA-LUDOVICA, sanctissi-
mos pariter & felicissimos Conjuges, FERDI-
NANDUM & BEATRICEM, repræsentare satagis,
justitia, clementia, religione; ceteris quoque
adjiciendarum divinitus gratiarum titulis par-
eficiaris eisdem, numero videlicet gloriose so-
bolis, dilatandæ inter barbaros Fidei successu,
aviti Imperii redintegrandi celeritate. Verum
quæ Sanctis istis Regibus fuerunt per annos se-
decim dumtaxat communia (nam post eos im-
maturo fato extincta BEATRIX locum fecit Jo-
ANNÆ, in ejusdem felicitatis consortiam per
annos fere totidem successuræ) TIBI ac SPONSÆ
Tuæ sint duplo ac triplo diutius indivisa: nec
nisi sero à tantorum bonorum usu-fructu separe-
tur etiam Serenissima MARIANNA mater. Ete-
nim ut BERENGARIA suum FERDINANDUM, Ca-
stellæ ac Legionis regnis, sic illa Hispanicarum
quam late per orbem utrumque patent ditio-
num Imperio filium, ipsumque Imperium filio

† S

CON-

conservavit, similia inter discrimina sine viri solatio. Vivat igitur, æque ac illa, longævos dies: exultet vestros intuendo successus, viætorias, incrementa. Vivat cum Vxore ac Matre MAESTAS TUA in senectam uberem, concordi cum ipsis animo pluribus imperans Provinciis, quam Sancti quos laudamus Reges dominati sunt Viribus. Da perpetuam orbi Christiano pacem, ut subditi populi firma gaudeant tranquillitate, Religio sancta crescat ac floreat, Romana Ecclesia exaltetur sublimius, CAROLO II, Hispaniarum atque Indianarum Regi Catholico, æternum obstricta. Ita vovemus, Hispali MDC^o LXXXIV, vi Idus Februarii.

SACRÆ MAIESTATIS TUE

Clientes ac Subditi
Decanus & Capitulum Hispalense.

AD